

太上洞淵神呪經卷之二十

制

長夜遣鬼品

道言昔吾與文始赤松子將諸梵王七十萬人遊乎世間五嶺之郊見刀兵而死者不唯一人太上愍之遣化人道士往問之子等何罪有禁斯者各各答之曰某等受斯酷毒罔測元由唯願大慈賜垂宗旨化人曰叱叱子知之不大劫將近水來不久一切民人當與泥同如此之徒不唯一人也子何不學道乃長存耳子貪富貴一時之間不得仙度萬劫不見善根與天地相蔽與災為期也世間不淨五賊牽人令人惡道喪人神炁將人入淵一舉失意悔無及焉太上說此之時坐中三萬九千人天女十萬人地下化人二十三萬人道士及魔王男女四十九萬人一時驚起求受此經自今以去奉持此法教化愚人令不貪生官不用王位各自擔我等今日聞天尊所說復用行之不敢違背也各各脫身衣以用受經矣

道言世間人民末世有三萬九千人得上仙

者乘太上九龍之輦天人三億萬人遊行國中接有仙骨道士當爾之世大水一起鬼兵亦交男女之人死者數多吾今特遣化人遊于四海令悉各各備經奉受大驅之文被尼示之其中自有信心者聞之歡喜求化人受之其中有不信之者聞亦不悟浩浩流流入九江三河而死盡奈何太上於空中乘五色雲輦觀之大慈念子等之愚奈何奈何以濟之也及乘龍將天人一切聖王五嶽仙人百億萬人於大水之中接取信心之人令人無畏大鳥負人將著九天之上乘龍之輦縱廣萬里乃有二千九百里者有十二百里者輦有八億萬輦容三億萬人自不受經者不聞法者不經齋者不識法界之人不得上此輦也大水將來化人雖接棟神司官斬之檢取罪人還置水中太上升至聖能救之也飛仙男女亦佐太上度人焉大鳥千萬一時亦來負取善行之人汝等道士今見此大驅經并聞太上觀其形像子等後世果得遇其龍輦耳聖不虛言矣

道言此仙人王女先天地而生生來多劫今與吾共教化愚人若有仙骨之人得見形像耳子等以復能各各傳化後生若男若女俱共受者終不橫死大水之時不在其中也大衆聞天尊說此悲思涕淚悉求受持太上啓之今化人入山作壇受之衆中男女八千萬人魔王男女不及還取質信各各詣山受之矣

道言汝等受此大驅寶經經中之要子等仙矣動相化度傳受愚人愚人倒見甚可哀愍來世大水將沒之耳聖人見愚人悠悠生活亦如世人觀劍中之蟲耳亦不知出時也汝等道士不化之者永沈生死矣坐中大衆五嶽仙人一切四部天人男女皆齊聲歎曰善哉我等亦當奉持之矣

道言北海之外異隣王國土四十八萬家不信道法殺生自用國內不安萬民之叛日殺三百人太上見大水將近愚人不知方作殃罪死入惡道何有出期乃入玄山觀一切眾生憊憊何所趣向手即放身中之光下照十

方遣十方化人乘空飛於異隣國土王等見之心中大驚此人乘虛此何物也非是妖鬼手即遣三萬人一時仰射之箭却來自中殺人人還自活官不能得殺之遣人白王王大怒遣兵士三萬人殺之不能得殺飛仙來下滿其國中滿溢俄為女人童子老人變身萬億至大怖懼叩頭向飛仙曰我等罪人不知大聖降下自今以去奉仙為師矣願垂納受仙人曰我等不中子師也我自本師名曰天尊若汝等有此心者當與子等往白之矣即將此國王等詣太上化人於是一時去王國中肅然無人王等曰此仙人大聖人也我等當更心奉之耳化人知王等之心悉化王國中人人各受道與其符籙經契亦作齋法今北海之外道法與馬王及大臣馬玄曰夫受此經奉師如何化人曰受此經者奉師如日月敬經如珠玉不得慢經不得輕師師如天也經如日也天不可毀日不可觸矣昇仙度世皆由於師耳無師又不得此經無經者不得上仙也子等奉師不得令懷嗔滿

一宿不得說師名諱道不兩相敬奉不得違心若子不從之頭破作七分矣

道言大水來時中國有仙人唐平仙人玉光仙人馬期領八萬天人仙人乘鐵船來接道士有經之人子等候之此仙人等來時上有五色之雲圓蓋長三百萬丈中有玉女十萬人光明赤白晃晃育育即是仙人來也汝等候之馬東林道士曰不審受何經得見仙人免脫三災也太上曰上清靈寶三昧無量悉亦免耳然道士不受此大驅經不得度三河大水亦不免運動劫之災也何以故此大驅經經中最上此經三十六部經經之王也更無大此者也此經經之都統受此經經之畢矣道士男女自非先身有其仙骨方得受此經也此經與無量同胎若欲法用一一如無量之法耳欲得仙騰當讀無量寶經道士不受此無量大驅經者亦非道士也坐中八萬四千人聞太上說之各各三禮求受奉行之焉弟子等自今以去持此經遍化天下之人悉受者乃門門化之耳

道言人有三魂七魄死便奔驅驅於五陰之中是以死者有吉有凶春三月死者太陽使者殺之名屬九夷君九十萬大神選之其號威靈星宿當滅復連自絕行禮入定十鍊生尸七魄無為不經五苦得陸泥丸依禮元方天人所護分別善惡若人死後有人轉此經者大神八億萬人超其死魂還令生天若在人中候玉長者衣食自然不令經苦及有作此齋處天人玉女八億萬人仍下視之道士功德生人獲福亡人上墜斯由追齋之力

道言夏三月死者乃是洪林太陰司命部落殺之名屬八蠻君八十萬人選之星宿當滅復連未絕有人死者自今以去有人轉此經處亡人不遷不得生天人中者吾當遣光明仙人太輪仙人諫之仙人方生各領三萬九千天丁十萬力士打殺魔王選官主者十鍊大神不使上達常為小鬼中之甲永無仙期太上金口所詔令一行告下不怨如太上口勅者汝等小鬼王必有上遷耳若自禁令以行行而不用別令橫殺大神九十萬人各持

赤捧捧後惡鬼五道象官十方選神宜自利
比不令亡人更有上聞上聞之日汝等先坐
太上金口終不容恕一如太至上至真所說悉
從用者若不用者魔王鬼王頭破作十六分
矣

道言秋三月死者乃是六傷大疫水火殃災
殺之名屬六戎君選神六十萬億人名字自
生天中星宿當滅復連永絕自此月日有人
死亡及轉經五道選官十鍊生尸不得上天
者坐兩舌惡口劫人殺人五逆不孝欺師罵
父打捍長者若兄弟若姑若姨若伯若叔
等悉入地獄九十一劫不得生天天人與官
不容之也雖為轉經無益矣罪與謗人者同
道士須善當自化人奉受三洞敬經行道若
有亡者為之轉經經神勸下亡人上遷徑上
生天自癸未辛巳道士化人度人焉可得免
三災甲申之大水也
道言凡冬三月死者明詔使者殺之坐不行
道法笑人作善及惟百姓自是非人三魂七
魄名屬五狄君選官五十萬人分別善惡星

宿當滅復連當絕自今以去人死者為鍊神
鍊神之君八億萬人令亡者生天天女迎之
不得飛仙當得生人十鍊生尸十方來賓天
下共選不得下生若墮三滄魔王之過太山
主薄五道主者名山仙官不加用意使亡人

經難者汝等先坐太上口勸終不虛也道士
化人吉凶憑齋齋神護身矣
道言凡人刑獄死者文吏司主之寒熱死者
明王司主之落岸樹死者楚羊司主之刀兵
死者衿人司主之木索死者女羅司主之水
中死者玄女司主之火燒死者天輔司主之
林木死者何王司主之飢餓死者蓋盈司主
之臃腫死者季膺司主之針刺死者龍王司
主之夢忤死者林玄司主之閉塞死者劉史
司主之悲枉死者左任司主之顛狂死者丁
芮司主之自刺死者朱令司主之入水死者
胡純司主之長病死者喬秋司主之自今以
去若人如此落十八司死者但轉此文所殺
之官聞人轉經經中之神神自分別今人上
遷亡者自生人中自壬午辛巳吉凶悉轉

此經耳

道言人生皆屬角亢心尾箕斗牛女虛
危室壁奎婁胃昂畢星參井鬼柳星張翼軫
魁魁魁魁魁魁魁若星宿有名自有將從萬
億步數里陌太上天今矜衆生故示一切大鬼
王自今以去若有人家能作大福轉此經處
悉分別令亡人生天衣食自然若在三塗拔
之令出星宿不度當為度之星宿不滅當為
滅之若復不遷復連不絕者大鬼王等先生
一切選官五道主者太山主薄悉當有罪罪
必成科不得上仙矣
道言凡人已死不及三七日者十年五年百
年皆可追作功德耳但為亡人十鍊行善行
二五七九之功補過若先亡人無錄亦加錄
與之天玄黃書此乃大經統受此一契無不
包通也生人無大錄者亦可受十將軍奉佩
天玄黃書契今便可受三洞耳來者與之不
問卑賤何以故大道如海海何有違於穢惡
哉大法無邊大人無異道士化人慎勿相妬
相妬者天人奪子善矣道法萬品智者弘念

之耳

道言自今轉此鍊神之處吾今天兵九十億萬人與十方力士八萬人仙官主者十二萬人玉女三千六百人各手持赤戟打殺天下惡鬼殺天下惡口之人辟斥群官盜賊一切白衣圖謀道士欲偏併侵欺此法師之者一救其人生魂斬殺之不想道士勤化人大魔王鬼主一切主者選官之神當為亡人追逐文書若在三官請作苦處惡當告下出此亡人令得生天若其不遷亡人三陰吏兵有坐自今甲戌之年世間之人得聞三洞之骨男女道士多有值此文者悉皆天上生來耳世之惡人不得此聞之也

仙人來化故令此人等信心自生得見大法師善哉男女必得上仙終不落湖矣

道言若人死後有生者為作功德亡人必復人身身既復自上天生天之後復入人中衣食自然若處世俗為人之師若作道士學道國王尊之為師不作常人若作國王方伯二千石令長心常念善勸人行道身自奉法三洞之經尊師敬神恒如日月此人今身大貴傳世相承無有休己子等今身端正亦是大道覆之富貴貧賤亦是大道使之為之醜惡亦是道惡耳但一心信道道不虛言坐中億千萬玉女聞說是法悉大喜悅各各三禮當化人受奉之矣

自然助入善心矣齋法一日二夜三時行道也

道言昔有一國多有虎豹道中食人時有三洞道士男女之官入山採藥還道中見人問之曰道中無虎也行人知虎在道中誑道士曰無虎也道士等往之虎化成鹿見道士不驚亦無惡心道士等聞道中無虎喜而急去天人護之知行人誑道士心正天自違之覆護耳是以道士之法但立信心信心存者自然附人耳是南海焦買將八十人入山求仙居山七年天下惡鬼日有百萬人來下試之道士大衆等永無惡心我奉太上無極之契何汝小鬼來恐我也一存信意無移易鬼自然去道士等天女化之後悉得上仙矣是以道士唯存信心耳

道言甲子之年六夷侵於中國中國無主司馬移度其地江左自立為帝後金刀兄弟王治天下太樂人民禽禽四夷無事至辛巳年小小六夷動亂至壬午癸未絃甲申有災災水四十丈若無水者多是大兵虜當南

下而無害九州悠悠會真君金刀之末帝移治長安之地地不受人也當去之時土人先去備人在後自然天然非人意也道士玄門國主敬奉道法欣六夷亦伏中元更立明王治化無有刀兵惡心之人矣流居之民運

復中都天下安樂唯集太平也西華太極經

道言壬午年巳年有見道士入山斷穀休養以求仙道又見道士不貪世榮追師勤苦以求仙道又見道士不務俗緣一心奉經以求仙道又見道士不妻不娶以求仙道又見道士專心自役為臨執者以求仙道又見道士不食供養供師以求仙道又見道士不惜財物廣造經像以求仙道又見道士多受契籙以求仙道又見道士棄妻不仕國王以求仙道又見道士日日勸人以求仙道又見道士廣造治靖以求仙道又見道士奉師不慢以求仙道又見道士不作有為以求仙道道言人行道奉師師前曳脚跪坐見師不驚調誑師徒十無一實若此之人令汝虛耗天人誅之不盡天年奉師當如臣見天子豈可

嬌慢人不有輕也師雖常人鬼神之主汝以奉之神來附汝若汝不敬師師亦不待汝教也但師有仙靈營護之神神怒誅人所以汝等道士深自慎之矣道言自今至辛巳年當有赤人赤人長三尺

七寸三億萬人居東海水中亦有學仙道士南海有八十萬人人身長九尺亦來入中國受道時人或不識之矣水人在海中曲山上亦有男女居在水中時出九曲山上有學道人多端正天下無有此比矣水中人王三百夫人夫人悉受道法天女玄女之仙化之三洞大經布流於西海亦有人長一丈七尺亦有夫婦之道行道異於中國之人矣王方平麻姑日日往彼化人此國亦有水人身長一丈六尺多有女人少有男子王身長二丈九尺及三千夫人各有三十六王子不食五穀天人亦往來水下作金玉七寶之室人身亦衣金玉七寶之衣也中國人得亦不能別之行則乘風而駕雨亦有自然之道然矣此之水人等居在水下水在上流耳海中大蟲非

世人所知亦有大馬大牛如大馬人頭百億萬種不以一物也無可比之者矣世所無此也道言世間人有三十六種人也東海外九萬里赤月支山山高九億萬丈上有三頭共一

身身如蛇也制十不食五穀食人蟲鹿鳥獸人身能飛行南海外三十萬里有竹山山高七十萬丈中有一角人人長六丈七尺亦食蟲鳥草木耳語不可解西海外七十萬里人長五尺食石沙水語不可解北海外五十萬里亦有一山山高二百丈山上一身三面人長九尺不能食穀食草子耳不知人事有陰陽夫妻之然生子如人而走及飛鳥虎狼畏矣道言此水人三千年乃死山中野人三百年亦死耳不知有道無有禮義矣正有中國之人知禮義耳中國東西南北十四萬里人人知法學大道有自然天人往來耳餘國無有此也十方無量國此是異國不同小小國聖人所居自非太上仙人不得往彼也元真仙

人曰何國國為美里是中國之次也天學告
太上曰中國長安是也東至海陽南至吳楚
之外郊西至屬賓北至沙漠悉是中國之名
也然今之人禮道正有中原吳楚蜀漢建業
洛下之人耳男女信法荆楚江夏南陽周地
為上矣慈嶺西涼北地玄菟之人少學仙之
人矣

道言天下之宮杜陽宮為上武當山其次中
國有九十萬億宮宮有七十萬小宮宮中有
三千萬人山上有四十九山中之上者杜陽
山山東西千二百里山可住平休旬陽谷入
二百里可隱昔有法師往化道法三洞流布
旬中有應飛仙之人籍超杜玄之邢彤法李
馬進張奴對石子貴此之等悉上昇為師矣
仲山有古人住處今人名曰詳川周惠王小
子得仙宮在其中其中人多有得仙者道士
後世人得值見此法師三洞經者悉得飛仙
也此川人後世男女亦多有道士值遇聖人
耳何以故古之仙人董玄可居在其中得仙
久矣時來化人人民信道者此仙人等教示

之耳

道言後世有三千道士海中來風風百眉宮
宮在西域北山中伏羲之弟居處也伏羲本
居仇池山上亦在西域牛山女媧山亦是古
之聖人住處在詳川周時有三萬仙人居此
山上

道言雲臺山岷山縣竹山赤石山龍和山
寧蜀山山上有古人仙人住在蜀中城都人
壬午辛巳三洞為上汾陽山巴嶺山上五山
在巴西梓桐山也多有古之仙人居地林窟
道士後世門門悉是玄女玉仙所化日日往
彼化之法師矣行十方出淨山巴山建平山
有仙人七十萬人隱矣

道言奉道之家三會之日詣師不得闕也凡
三會詣師皆費天租一碩不得一勝少也庫
倉吏考人今人家中不利六畜暴死所為不
成此天下毒疫耳三會詣師香三兩以為常
事凡詣師亦有法禮調御不得空也若有疾
病急疾不論供敬如父不得有慢出一宿亦
拜師師止則止耳道士坐案治職無貴賤也

參座考問無復後殃集未怨鬼也若受經多
而治小多經者為大也治大無經乃小治矣
道言受道奉法之家當供肅天租年年自輸
詣治自當憂之不可令師道也天人誅汝一
斛不足師啓天曹主人還受殃罪不豫師也
世人愚癡乃反怨師師不得亦無罪也一一
上聞者今汝道民不利耳夫受道及經亦然
但不能一一如法也不可虛也世人多窮不
肯自力但望虛得聞師多責案法科令無能
受者此為自欺人也道士心慕道門者當自
勵力求信物令備具從法心中元元師可為
除之耳不絕然無也

道言自今以去天上黃書契令并經為上不
復受者今世黃赤紫府也有不受者考悉近
人矣何以故三洞流布令人有病急但喚三
洞道士入治稽首燒香香火消之自然萬事
散了耳不須章也天曹上從壬午辛巳年不
受人章為世人作章主人考死師亦有罪作
章一通隨事取生人口中辭語三師若八師
五師若一師上治東向章章步虛誦誦便止

自然鬼兵消總亦須餅果麵食扶養也自今
以去一一扶章禮畢拜拜

道言夫人受錄符契一將軍已上悉應供養
乃受質信如法一一不得寬也天上黃書八
人食耳治以經都通作者十二人人食此為

常範矣世人不知多作無奇也道士作福日
月作之齋講為先奉師在心若一旦不如法
輕慢於師師慢不終月旦十五日朝拜誦經

禮其十方并禮師者安行一步步有三十六
考罪罪入無權地獄求出無詣莫望仙道也
道言自今以去辛巳壬午年三洞流布布化

天下天下之人不復章奏男女奉經入山者
衆女人多受經天女化之甲申過者道炁方
盛六夷伏信諸仙亦同法一家耳道士自今

壬午年以去亦作冠褐裙披三法衣策杖耳
一日一食過中不啖斷一切葷酒亦不容教
化俗人為事不得犯科男女相度智者為師

不得畜生生之物正乃然一身耳經書為業
入山中人月月長齋齋空食米耳入山十人
三十人百人一處廣作田植園菜五菓屋舍

四方并齋堂樓閣不得一人二人三人獨住
鬼神欺人經法不可獨齋堂人多月月三齋
日日三時上香禮拜十方此為神來附人矣

二人一人獨在山中復不立法建齋直獨在
山中蟲鹿亦在山中耳此為何異也當奉明
師師多才技又多經文乃一人上可佳多

逐上十人者不可佳也況復二人五人也此
不伏山神山神欺人人亦不吉矣
道言人以黃書受來經久不得師過度日日

有考令人多病田蕪虛耗空中不利不終年
壽中道而天又復不可還師符契神已入人
身中臟腑故令人疾耳若奉法行道三師度

者無他也道士受經經為大者昇仙之本是
以衆師之中經師為大也仙人玉女莫不敬
經師凡符契為上也道士不受諸符契不名

道士也不奉三洞非道士也空受內外黃赤
紫府小道士耳要當受五千文經書上符
契事事受之乃得上仙矣

道言道士入山若人間奉師死者往登觀
之葬埋以禮衣帶如法七日哭泣便為作齋

齋者七日一作之滿三七日便止耳弟子死
師亦看視如之法不可殺生祀之也隨時餅
果可耳道士後世之人按經文用之焉不用

者天人矣終不與死也餘物悉與之耳
道言後世人必治三洞之上原值此飛仙經
者即見太上面像也不能入山者但逐延林

山可遠世人十里五里絕別之處多種五菓
木林田園月月作齋齋令不廢化度愚人令
奉三寶師無大小奉尊則貴昔羅和年九十

八歲師年十六歲日三度禮拜師侍從左右
恭敬不慢世人見之歎曰此老翁鬚首西垂
之年乃如此年少小兒拜也天人五女曰此

是老翁宿世之師耳小兒雖小智深遠矣
道言師徒弟子先世之重緣亦如父子耳皆
是前身相逐一處來久結摺累劫非只今相

親作惡緣者亦復然也若國主大臣方伯二
千石今與此道士學仙善者亦先世緣耳自
不重緣不得為師宗父子矣今之聰明樂經

就書皆以先世習來久也師徒亦耳共同一
心積來久矣摺為師友以見此經今乃受之

受之智者此人先身以學來故也時不知世之事謂其人聰明此亦明矣然伏讀來久矣道言後世多疫鬼鬼兵殺人道士可教人八節日齋一村共作之多多為善耳立春日春分日立夏日夏至日立秋日秋分日立冬后冬至日正月十五日七月十五日十月十一日大齋日也道士此日作齋按大法學仙士三日三夜轉經行道其福無量也道士之法自非師徒大者為兄小者為弟不得稱僕也空鬼誅人道士慎之焉欲八節日齋但擇野水壘洲之上清淨簡寂之所一齋也

道言自壬午之後以來復奏章不復受世間黃書契令天女所受無門而受自今以去至癸未之年甲申過者不復用問黃書契令直此天下黃書耳若正受世間黃書者不得上仙若男女之人先無仙錄者但與十童子一將軍已上便受天上黃書契令三師若一師之亦是大道士也便可經契耳世人不知大水來近不肯受道大災之時奄然死盡奈何

奈何若不能多受者受五千文化胡經亦善矣

道言自今以去至壬午年已有女人道士多有受三洞入山者亦多女道男子反少也玄女常下來化作年少女子入人間受甲申之後男女十三已上悉受十將軍童子天上黃書契令何以故世轉信道麻姑杜蘭香與安期生唐公房化人悉受道士門門有之經書為上齋講日夕多矣江左吳楚漢秦蜀郡多有習道之人矣

道言三洞出世仙人日下道士男女當勤經契多受符錄一心信善念師功德供養道士道士無貴賤有請消災香火不得有違一旦也道士自有吏兵侍衛不得一旦一夕有違吏兵當告人愆過天使吏兵違人夜去身中吏兵還自誅人亦令人疾病病人久考令人不健諸色夢寐不吉吏兵為之也昔有一人女官人請消災誰人言曰我今日身中不淨不可入治不得消災也誰人之罪後二月日女官下血三年遂不消瘥卜師占曰汝有罪

罪甚大天曹考汝耳女官自思惟正有此罪人恐必此罪也請道士作齋懺悔一月耳乃還瘥矣

道言自今以去告後世人汝等受道夫妻對受不得偏也夫受黃書三師過度適受黃契不過身考後世不復人身也沈復求仙也亦不得誑人也奉道不香火身必有考考及子孫昔有二家相近都悉受黃書內外大契一家得三師過度日行道道士消災觸事好日不違人意夫妻上仙人護之有一家亦受而不過度而無三師自共相妬始遂不行道不終天書二年中皆滅門族天人誅之矣受道須一一順其經文也

道言世人多癡夫妻共奉道奉道以妬忌不合行道道悉更共怒之後死入火車八風地獄中一日三死三生七十萬劫不復人身脫得復人有人之形無人之情擊擊瘡瘡為人形醜陋身體臭處人不喜見道士慈心化人遠此弊矣道士蔬衣蔬食寫經多學奉師為事耳教諸後世男女道士明自思之也

道言道法難值者稀耳後世見者勤恭奉之不惜財物道士為人之師亦不足多取人財道士欲奉佩所望期仙亦不可貪惜矣自除妻子其生口牛馬勿足貪也昔日亦有妻子布施賣子受經者不唯一人也自古及今信道者一人二人者矣

道言三洞大經經之上者然不如飛仙經之上也何以故飛仙經十方大道太上一切仙人玉女遊化世界化人說之中有無量神人兵馬守之有人受之者神仙護之無不吉利也後世辛巳壬午年以此經天下流行世人講誦勝於餘經道士齋戒多轉此經此經能令人飛仙也三洞多容亦有尸解仙住仙此經無也正有飛仙耳此經二十卷天人玉女十方仙人所共尊敬之矣

道言自今至壬午辛巳年道士急化世人受道大災欲起天放疫炁瘟疫流行殺人為多惡人故也若有作功德者鬼兵別之道士至其年月水災之時勸人作治舍受奉三洞正經經契在身吏兵力士自然攘惡耳水來不

久當在甲申甲申無者兵刀災運百姓絃紘後甲申大水蕩除當爾之時更立天地不唯今日之天下也

道言世間多有惡人故三洞不時布亦少耳眾生可念與泥同流鬼兵誅之奈何奈何太上與文始三日三夜在玄都官中惟念眾生生死何方度之乃入金匱之中取太上太虛經飛仙經二十卷付與太宗法師令得授世間之人也

道言自今壬午辛巳年道士往往有值此飛仙太虛經者上黨除文之申執當值此經文上仙矣女人二十六萬人中受經入山中也道言自今有人值此師師授此經者十方飛仙五嶽仙人玉女無極丈人一切玄女咸來共護此受經之人若此法師所住之處天下

太和五穀豐熟人民安樂帝王老壽天人日來下教授之助此國主治化矣
道言道士之功德令如此耳若國主大臣方伯二千石復能奉受者位至無窮也天人自為守護之耳終畢此人等不令犯惡也眾中

一切開太上說此經各各大喜悉皆受化稽首禮拜皈依三寶

太上洞淵神呪經卷之二十

。

。